

官板
歷代君鑑

卷十三
之十七

三

			二	漢
		九	八	書
	六	二	五	門
一	〇	八	八	
冊	架	函	號	類

庫	文	閣	內	
三	六	一	五	漢
函	〇	八	八	書
架	冊	號	類	

內閣文庫	
番號	漢 2858
冊數	10 (3)
函號	287 140



歷代君鑒卷之十三

善可為法

西晉

武帝

世祖武皇帝諱炎。字安世。姓司馬氏。魏相國晉王昭之長子也。寬惠仁厚。沉深有度量。初封為魏北平亭侯。繼立為晉王太子。晉王薨。太子嗣相國晉王位。嘗下令諸郡中正。以六條舉淹滯。一曰忠恪匪躬。二曰孝敬盡禮。三曰友于兄弟。四曰潔身勞謙。五曰信義可復。六曰學以為己。於是時晉德既洽。四海宅心。帝

淺草文庫

遂受魏禪。卽位之初，興滅繼絕，約法省刑，除漢魏宗室禁錮，諸將吏遭三年喪者，遣寧終喪，百姓復其徭役，罷部曲，將長吏以下，質任省郡國，御調禁樂府靡麗百戲之伎，及雕文游畋之具，開直言之路，置諫官以掌之。○初文帝之喪，帝雖從漢魏之制，旣葬除服，而深衣素冠，降席撤膳，哀敬如居喪者。有司奏改服進膳，不許。遂禮終而後復吉。及太后之喪，亦如之。○帝將謁崇陽陵，群臣奏言秋暑未平，恐帝悲感摧傷。帝曰：朕得奉瞻山陵，體氣自佳耳。○有事於太廟，朝議太常丞許竒父允受誅，不宜接近左右，請出爲外

官。帝稱竒才，擢拜祠部郎。有司言御牛青絲紉斷，詔用青麻代之。矯魏氏刻侈之敝也。○太保王祥病，御史中丞侯史光以祥久疾，闕朝會禮，請免祥官。帝曰：太保元老高行，朕所毗倚，以隆政道者也。前後遜讓，不從所執，此非有司所得議也。遂寢其奏。祥固乞骸骨，詔聽以睢陵公就第，位同保傅，在三司之右，祿賜如前。詔曰：古之致仕，不事王侯。今雖以國公畱居京邑，不宜復苦以朝請。其賜几杖，不朝。大事皆諮訪之。賜安車駟馬，第一區，錢百萬，綉五百匹，牀帳簟褥，以舍人六人爲睢陵公舍人，置官騎二十人，以公子騎

都尉肇爲給事中。使常優游定省。又以太保高潔清素。家無宅宇。其權畱本府。須所賜第成乃出。○散騎常侍皇甫陶。傅玄。領諫官。上書諫諍。有司奏請寢之。帝曰。凡關言人主。人臣所至難。而苦不能聽納。自古忠臣直士之所慷慨也。每陳事出付主者。多從深刻。乃云恩貸當由主上。是何言乎。其詳評議。○賈充上所修律令。帝自臨講。使尚書郎裴楷執讀。侍中盧璠。中書侍郎張華。請懸死罪條目示民。帝從之。○帝詔郡國守相三載一巡行屬縣。所以見長吏。觀風俗。協禮律。考度量。存問耆老。親見百年。錄囚徒。理冤枉。詳

察政刑得失。知百姓所患苦。無有遠近。便若朕親臨之。又詔王公卿尹及郡國守相。舉賢良方正。直言之士。班詔書五條於郡國。一曰正身。二曰勤百姓。三曰撫孤寡。四曰敦本息末。五曰去人事。帝又臨聽訟。觀錄廷尉洛陽獄囚。親平決焉。○鄴奚官督郭虞上疏陳五事以諫。言甚直。擢爲屯畱令。西平人麴路伐登聞鼓。言多祲謗。有司奏棄市。帝曰。朕之過也。捨而不問。○帝置太傅少傅各一人。以輔導東宮。制禮以大子先拜。二傅然後答之。有司奏東宮施敬。二傅儀以不臣。有乖常典。帝曰。崇敬師傅。所以尊道重教也。何

言臣不臣乎。其令太子申拜禮。○帝嘗得疾甚劇。及
愈。群臣上壽。詔曰。每念疫氣死亡者。爲之愴然。豈以
一身之休息。忘百姓之艱難邪。諸上禮者。皆絕之。太
醫司馬程據獻雉頭裘。焚之殿前。勅內外敢有獻奇
技異服者。罪之。○帝與右將軍皇甫陶論事。陶與帝
爭言。散騎常侍鄭徽表請罪之。帝曰。忠讜之言。惟患
不聞。徽越職妄奏。豈朕之意。遂免徽官。征南大將軍
都督荊州諸軍事羊祜卒。帝以其忠君愛民。哭之甚
哀。是日大寒。涕淚霑須。爲冰。帝嘗封祜爲南城侯。固
辭不允。至此遺令。不得以南城侯印入柩。帝曰。祜固

讓歷年。身沒讓存。今聽復本封。以彰高美。○咸寧間
大水螟。帝問主者何以佐百姓。尚書令杜預曰。今者
水災。東南尤劇。宜勅交豫等州。畱漢氏舊陂。以蓄水。
餘皆決瀝。令饑者得魚菜螺蚌之饒。此目下日給之
益也。水去之後。填淤之田。畝收數鍾。此又明年之益
也。典牧種牛。有四萬五千餘頭。可給民使耕種。責其
租稅。此又數年以後之益也。帝從之。民賴其利。○涼
州羗叛。河西斷絕。帝臨朝嘆曰。誰能爲我討此虜通
涼州乎。朝臣莫對。馬隆進曰。陛下若能任臣。臣能平
之。帝曰。必能滅賊。何爲不任。顧卿方略何如耳。隆曰。

陛下若能任臣。當聽臣自任。臣請募勇士三千人。無問所從來。率之鼓行而西。稟陛下威德。醜虜何足滅哉。帝知其能許之。公卿僉曰。隆小將妄說。不可從也。帝弗納。卒用隆。隆果滅羗。捷報至。帝召群臣。謂曰。若從諸卿言。是無涼州也。○一日。帝祀南郊禮畢。喟然問司隸校尉劉毅曰。朕可方漢之何帝。對曰。桓靈。帝曰。何至於此。對曰。桓靈賣官錢入官庫。陛下賣官錢入私門。以此言之。殆不及也。帝大笑曰。桓靈之世。不聞此言。今朕有直臣。固爲勝之。○帝疾篤。未有顧命。勲舊多已物故。侍中楊駿獨在左右。惡衛瓘。使以太

保就第。易要近樹心腹。會帝小間。見其新用者正色曰。何得爾邪。乃詔汝南王亮同駿輔政。又欲擇朝士有聞望者數人佐之。會帝復迷亂不果。尋崩。在位二十五年。享年五十五。

史臣論曰。帝宇量弘厚。造次必於仁恕。容納讜正。未嘗失色於人。明達善謀。能斷大事故。得撫寧萬國。綏靜四方。承魏氏奢侈革弊之後。百姓思古之遺風。乃勵以恭儉。敦以寡慾。雅好直言。畱心采擢。劉毅裴楷以質直見容。嵇紹許奇。雖仇讎不棄。仁以御物。寬而得衆。宏略大度。有帝王之量焉。聿修

春 卷十三
三
武用。思啓封疆。決神筭於深衷。斷雄圖於議表。馬
隆西伐。王濬南征。師不延時。獯虜削跡。兵不血刃。
楊越爲墟。通上代之不通。服前王之未服。王業之
成大矣哉。惜乎。帝名受魏禪。難逃廢主之譏。始雖
勤儉。終罹奢縱之過。政事敗於三楊之用。心術盡
於羊車之遊。雜處五胡。終致禍亂。方諸前代之令
主。不能無歎焉。

東晉

元帝

中宗元皇帝諱睿。字景文。宣帝曾孫。琅邪恭王覲之

子也。年十五嗣位。琅邪王幼有令聞。及惠皇之際。主
室多故。帝每恭儉退讓。以免於禍。沉敏有度量。不顯
灼然之跡。初鎮建康。吳人不附。會三月上巳。帝觀禊。
乘肩輿。具威儀。王導及諸名勝皆騎從。吳人顧榮賀
循覘之。驚異。相率拜於道左。導因進曰。顧榮賀循。此
土之望。未若引之以結人心。帝乃使導躬行。造循榮。
二人皆應命而至。由是百姓歸心。帝從容謂導曰。卿
吾之蕭何也。○四方競上符瑞。帝曰。孤負四海之責。
未能思倦。何徵祥之有。○愍帝凶問至。帝斬縗居廬。
百寮上尊號。令曰。孤以不德。當厄運之極。臣節未立。

匡救未舉。夙夜所以忘寢食也。今宗廟廢絕。億兆無係。群官庶尹。咸勉之以大政。亦何敢辭。輒敬從所執。卽皇帝位。立太子。詔曰。昔之爲政者。動人以行。不以言。應天以實。不以文。故我清靜而人自正。其次聽言。觀行。明試以功。其有政績可述。刑獄得中。人無怨訟。久而日新。及當官軟弱。茹柔吐剛。行身穢濁。脩飾時譽者。各以名聞。令在事之人。仰鑒前烈。同心戮力。深思所以寬衆息役。惠益百姓。無廢朕命。遠近禮贊。一切斷之。○大興間夏旱。帝親雩。詔曰。朕以寡德。纂承洪緒。上不能調和陰陽。下不能濟育群生。災異屢興。

咎徵仍見。壬子乙卯。雷震暴雨。蓋天災譴誠。所以彰朕之不德也。群公卿士。其各上封事。具陳得失。無有所諱。○帝以賀循清貧。下令曰。循水清玉潔。行爲俗表。位處上卿。而居身服物。周形而已。屋室財庇。風雨朕造。其廬深爲慨歎。其賜牀薦席褥并錢二百萬。以表至德。○帝欲旌古今賢能以勵士風。詔曰。漢高祖經大梁。美無忌之賢。齊師入魯。脩柳下惠之墓。吳之名賢。或未旌錄者。其條列以聞。○帝因連歲饑荒。下詔曰。天下凋弊。加以災荒。百姓困窮。國用並匱。吳郡饑人死者百數。天生蒸黎。而樹之以君。選建明哲。以

左右之當深思以救其弊。朕以今日當去非急之務。非軍事所須者皆省之。○從事中郎諸葛恢有經濟才略。調為會稽太守。臨行。帝為置酒。謂曰。今之會稽。昔之關中。足食足兵。在於良守。以君有蒞政之方。是以相屈。太興初。以政績第一。詔曰。會稽內史諸葛恢蒞官三年。政清人和。為諸郡首。宜進其位。班以勸風教。今增恢秩中二千石。○王敦之反。劉隗勸帝悉誅王氏。王導敦從弟。率群弟子姪二十餘人。每旦詣臺待罪。帝以導忠節有素。命還朝服。召見之。導稽首謝曰。逆臣賊子。何世無之。豈意今者。近出臣族。帝跌而

執之曰。茂弘。方託百里之命於卿。是何言邪。後帝疾慮太子幼。冲嗣位。既崩。果以司空王導受遺詔輔政。在位六年。享年四十七。

史臣論曰。帝性簡儉。冲素容納直言。虛已待物。初鎮江東。頗以酒廢事。王導深以為言。帝命酌引觴覆之。於此遂絕。有司嘗奏太極殿廣室施絳帳。帝曰。漢文集上書皂囊為帷。遂令冬施青布。夏施青練帷帳。將拜貴人。有司請市雀釵。帝以煩費不許。所幸鄭夫人衣無文綵。從母弟王虞為母立屋。過制流涕止之。故能抑揚前軌。光啓中興。然受懷帝

之命開府江左。王室有難，正宜整兵入衛。既不聞勤王之舉，方自爲僥倖之圖。卒使神州陸沉，不克恢復。此其可惜者也。

明帝

肅宗明皇帝諱紹，字道幾，元帝長子。幼而聰哲，爲元帝所寵異。建興初，拜東中郎將，鎮廣陵。元帝爲晉王，立爲晉王太子。及卽尊號，立爲皇太子。性至孝，有文武才略，欽賢禮士，雅好文辭。當時名臣自王導、庾亮等咸見親待。亮以中書郎侍講東宮。元帝好刑名家，以韓非書賜帝。亮諫曰：「申韓刻薄傷化，不足留聖心。」

帝納之。○嘗論聖人真假之意，導等不能屈。又習武藝，善撫將士。于時東朝濟濟，遠近屬心焉。王敦作亂，素以帝神武明略，朝野之所欽信，欲誣以不孝而廢焉。大會百官，而問溫嶠。皇太子以何德稱，聲色俱厲。必欲使有言。嶠對曰：「鉤深致遠，蓋非淺局所量。以禮觀之，可稱爲孝矣。衆皆以爲信然。敦謀遂止。元帝崩，帝卽位。葬元帝于建平陵。帝徒跣至於陵所。○帝後臨軒，停饗宴之禮，懸而不樂。王敦將舉兵內向。帝密知之，乃乘巴滇駿馬行。至湖陰，察敦營壘而出。帝命諸將分兵據守。敦兵至，帝躬率六軍出次南皇堂。夜

募壯士遣將軍段秀中司馬曹渾左衛參軍陳嵩鍾
 寅等甲卒千人渡水掩其未備平旦戰于越城大破
 之斬其前鋒將何康王敦憤惋而死○帝以逆賊既
 平而儲貳為國家大本於是立皇太子大赦增文武
 位二等賜鰥寡孤獨帛人二疋徵處士臨海任旭會
 稽虞喜並為博士詔曰大事初定其命惟新其令大
 宰司徒以下詣都堂參議政道諸所因革務盡事中
 又詔曰滄直言引亮正想群賢達吾此懷矣予違汝
 弼堯舜之相君臣也吾雖虛闇庶不距逆耳之談稷
 契之任君居之矣望共勛之○帝謂郊祀天地帝王

之重事自中興以來惟南郊未曾北郊四時五郊之
 禮都不復設五岳四瀆名山大川載在祀典應望秩
 者悉廢而未舉主者其依舊詳處○未幾帝不豫飲
 藥弗瘳及疾篤引太宰西陽王羨司徒導及尚書令
 卞壺將軍郗鑒庾亮陸曄丹陽尹溫嶠並受遺詔輔
 太子詔曰三恪二王世代之所重興滅繼絕政道之
 所先又宗室哲王有功勲於大晉受命之際者佐命
 功臣頌德名賢三祖所與共維大業咸開方嶽征鎮
 刺史將守皆朕扞城推轂於外雖事有內外其致一
 也故不有行者誰扞牧圉譬若唇齒表裏相資宜戮

力一心。若合符契。思美焉之美。以緝事爲期。百辟卿士。其總已以聽於冢宰。保佑冲幼。弘濟艱難。永令祖宗之靈寧於九天之上。則朕沒于地下。無恨黃泉。帝崩葬武平陵。在位三年。享年二十七。

史臣論曰。帝聰明有機斷。尤精物理。于時兵凶歲饑。死疫過半。虛弊既甚。事極艱虞。屬王敦挾震主之威。將移神器。帝嶠嶇遵養。以弱制強。潛謀獨斷。廓清大祿。撥亂反正。強本弱枝。雖享國日淺。而規模弘遠矣。○胡一桂曰。明帝卽位之初。王敦猶彘頤神器。賴溫嶠告帝先爲之備。所以躬帥六軍一

戰而勝。逆賊憤死。王含錢沈伏誅。黨與悉平。其剛明勇斷。克清大憝。爲何如哉。使降年有永。恢復中原。未可量也。

歷代君鑒卷之十三

歷代君鑒卷之十四
善可為法

南朝

宋文帝

宋主文帝諱義隆。武帝第三子也。永初元年。封為宜都郡王。時年十四。身長七尺五寸。博涉經史。善隸書。是歲來朝。會武帝當聽訟。遣訊建康獄囚。辯斷稱旨。武帝甚悅。及少帝義符廢。百官議所立。以宜都王素有令望。奉迎入繼大統。改元元嘉。初。司徒徐羨之。尚書令傅亮執政。至二年。上表歸政。始親覽萬幾。○三

年夏遣散騎常侍袁滄等十六人分行諸州郡縣觀
察吏政訪求民隱及使郡縣各言損益又躬臨延賢
堂聽訟自是每歲三訊焉○侍中王華王曇首殷景
仁劉湛風力局幹冠冕一時宋主嘗與四人合殿宴
飲甚悅既罷出曰送良久歎曰此四賢一時之秀同
管喉脣後世恐難繼也○四年春謁京陵宴丹徒宮
父老咸與蠲丹徒是歲租布原五歲刑以下夏都下
疾疫遣使存問給醫藥死無家屬者賜以棺器○五
年以陰陽乖序旱疫成患思所以上答天譴下恤民
瘼乃詔百司各獻讜言指陳闕失○六年以江夏王

義恭都督荆湘等州軍事與書誡之其略曰天下艱
難家國事重雖曰守成實亦未易隆替安危在吾曹
耳豈可不感尋王業大懼負荷夫以貴凌物物不服
以威加人人不厭聲樂嬉遊不宜令過捕酒漁獵一
切勿為供用奉身皆有節度奇服異器不宜興長又
宜數引見佐史相見不數則彼我不親不親無因得
盡人情人情不盡復何由知衆事也○八年以自頃
軍役殷興國用增廣資儲不給百度尚繁乃詔內外
詳思務令節儉又以農耒惰業遊食者衆荒萊不闢
督課無聞詔郡守縣宰悉心獎導使地無遺利耕蠶

樹藝各盡其力。○九年。詔曰。故太傅長沙景王。故大司馬臨川烈武王。故司徒南康文宣公劉穆之。衛將軍華容公王弘。征南大將軍承脩公檀道濟。故左將軍龍陽侯王鎮惡。或履道廣深。執德冲邈。或雅量高。勗風鑒明遠。或識準弘正。才略開邁。或文德以弘。帝載武功。以隆景業。宜卽配享廟庭。勒功天府。○十二年夏。揚州諸郡大水。運徐豫南兗三州。會稽宣城二郡米穀數百萬斛。以賑之。時揚州西曹主簿沈亮。以爲酒糜穀而不足療飢。請權禁止。詔從之。設爲酒禁。○丹楊尹蕭摹之上言。佛入中國。已歷四代。形像塔

寺。所在千數。材竹銅綵。糜損無極。無關神祇。有累人事。不爲之防。流遁未息。請自今。欲鑄銅像及造塔寺者。皆當列言。須報乃得爲之。詔從其言。乃禁擅鑄像造寺者。○初。武帝克長安。得古銅渾儀。儀狀雖舉。不綴七曜。十三年。詔太史令錢樂之。更鑄渾儀。徑六尺八分。以水轉之。昏明中星。與天相應。○十五年。徵豫章處士雷次宗。至建康。爲開館於雞籠山。使聚徒教授。又使丹楊尹何尚之。立玄學。太子率更令何承天。立史學。司徒參軍謝元。立文學。并儒學。爲四學。宋主數幸次宗學館。令次宗以巾禱。侍講資給甚厚焉。○

十九年詔魯郡脩孔子廟及學舍。蠲墓側五戶課役以供洒掃。○二十年詔曰。國以民爲本。民以食爲天。自頃在所貧罄。家無宿積。誠由德政弗孚。耕桑未廣。守宰微化。導之方。氓庶亡勤。分之義。有司其頌。宣舊條。務盡敦課。遊食之徒。咸令附業。考覈勤惰。以行誅賞。○二十一年命衡山王義季爲南充州刺史。餞于武帳岡。將行。敕諸子且勿食。至會所。設饌。日旰不至。皆有飢色。乃謂曰。汝曹少長豐佚。不見百姓艱難。今使汝曹識有飢苦。知以節儉御物耳。○初江左二郊無樂。宗廟有歌無舞。二十二年南郊始設登歌。於是

郊廟之樂備焉。○二十三年車駕幸國子學。發策試士。得答問者五十餘人。詔曰。庠序興立。累載。胄子肄業有成。近親策試諸生。答問多可採覽。教授之官。竝宜沾賚。於是賜帛各有差。○宋主聰明慕學。雅重文儒。躬勤政事。孜孜無怠。加以在位日久。惟簡靖爲心。于時政平訟理。朝野悅睦。又性存儉約。不好奢侈。車府令嘗以輦。輦故請改易之。又輦席舊以烏皮。緣故欲代以紫皮。宋主以竹箬未至於壞。紫色貴。竝不聽改。其率素如此云。在位三十年。壽四十七。

史臣李延壽論曰。文帝性仁厚恭儉。勤於爲政。守

法而不峻。容物而不弛。百官皆久於其職。守宰以六葦為斷。吏不苟免。民有所係。三十年間。四境之內。晏安無事。戶口蕃息。出租供徭。止於歲賦。晨出暮歸。自事而已。閭閻之內。講誦相聞。士敦操尚。鄉恥輕薄。江左風俗。於斯為美。後之言政治者。皆稱元嘉焉。

歷代君鑒卷之十四

歷代君鑒卷之十五

善可為法

北朝

魏孝文帝

魏主孝文帝。姓拓跋氏。諱宏。獻文帝弘之太子也。母曰李夫人。皇興元年。秋八月。生於平城紫宮。潔白有異姿。襁褓岐嶷。長而弘裕。仁孝綽然。有人君之表。獻文尤愛異之。五年。秋八月。受禪。即皇帝位。○延興元年。秋九月。詔在位及人。庶進直言。冬十二月。詔求舜後。獲東萊人。嬀苟之。復其家。畢世以彰盛德。不朽。○

二年春正月詔曰頃者淮徐未賓尼父廟隔非所致令祠典寢頓禮章殄滅遂使女巫妖覲淫進非禮自今有祭孔廟制用酒脯而已不聽婦女雜合以祈非望之福祀者以違制論其公家有事自如常禮○三年夏四月詔以孔子二十八世孫魯郡孔乘爲崇聖大夫給十戶以供灑掃秋九月詔曰今京師及天下囚未判在獄致死無近親者給衣衾棺槨葬之不得暴露冬十一月詔以河南州郡牧守多不奉法致新邦百姓莫能上達遣使者觀風察獄黜陟幽明搜揚賑恤○太和二年夏五月禁皇族貴戚及士民之家

不顧氏族下與非類昏偶犯者以違制論○五年春正月南巡至中山親見高年問人疾苦二月賜孝弟力田孤貧不能自存者穀帛各有差免官人之老者還其親○秦州刺史于洛侯性殘酷刑人必斷腕拔舌分懸四體合州驚駭州民王元壽等一時俱反有司劾奏之魏主遣使至州於洛侯常刑人處宣告吏民然後斬之○九年春正月詔曰圖讖之興出於三季既非經國之典徒爲妖邪所憑自今圖讖秘緯一皆焚之畱者以大辟論又嚴禁諸巫覡及委巷卜筮非經典所載者○十年春三月柔然遣使者牟提如

魏時敕勒叛柔然。魏左僕射穆亮等請乘虛擊之。魏主曰：兵者凶器，聖人不得已而用之。先帝屢出征伐者，以其未賓之虜故也。今朕承太平之基，柰何無故動兵革乎？厚禮其使者而歸之。秋九月，作明堂辟雍。○十一年春正月，詔定樂章，非雅者除之。○冬十月，詔罷起部無益之作，出宮人不執機杼者。又詔曰：鄉飲之禮廢，則長幼之序亂。孟冬十月，人閑歲隙，宜於此時導以德義，可下諸州黨里之內，推賢而長者，教其里人父慈子孝，兄友弟順，夫和妻柔，不率長教者，具以名聞。○十一月，詔罷尚方錦繡綾羅之工，百姓

欲造任之無禁。其御府衣服金銀珠玉綾紬錦太官雜器太僕乘具內庫弓矢出其大半。班賚百官及京師人庶至工商阜隸逮於六鎮戍士各有差。又詔今寒氣勁切杖箠難任。自今月至來年孟夏不聽考問罪人。其輕囚宜速決遣。無令薄罪久畱獄犴。○十三年春二月，引群臣訪政道得失損益之宜。秋七月，立孔子廟於京師。尋又祀於中書省。改謚曰文聖尼父。親行拜祭。○十四年秋九月，太皇太后馮氏殂。魏主勺飲不入口者五日。哀毀過禮。中書曹楊椿諫曰：陛下荷祖宗之業，臨萬國之重，豈可同匹夫之節以取

僵仆。且聖人之禮。毀不滅性。縱陛下欲自賢於萬代。其若宗廟何。魏主感其言。爲之一進粥。○十五年。夏五月。更定律令於東明觀。親決疑獄。命李冲議定。輕重潤色辭旨。魏主執筆書之。○十六年。春正月。詔祀帝堯於平陽。舜於廣寧。禹於安邑。周公於洛陽。皆令牧守執事。○十七年。夏五月。臨朝堂。引公卿以下。決疑獄。錄囚徒。魏主謂司空穆亮曰。自今朝廷政事。日中以前。卿等先自議論。日中以後。朕與卿等決之。冬十月。魏主如鄴城。王肅見魏主於鄴。陳伐齊之策。魏主與之言。不覺促席移晷。自謂君臣相得之晚。時方

議興禮樂。變華風。凡威儀文物。多肅所定。○十八年。春正月。魏主南巡。過比干墓。祭以太牢。自爲祝文曰。嗚呼。介士。胡不我臣。○秋九月。詔曰。三載考績。自古通經。三考黜陟。以彰賢否。今三載一考。考卽黜陟。欲令愚滯無妨於賢者。才能不壅於下位。各令當曹考其優劣。爲三等。六品以下。尚書重問。五品以上。朕將親與公卿論其善惡。上上者遷之。下下者黜之。中中者守其本任。於是魏主臨朝堂。親加黜陟。○十九年。夏四月。幸魯城。親祠孔子廟。拜孔氏四人。顏氏二人。爲官。選諸孔宗子一人。封崇聖侯。邑一百戶。以奉孔

子祀命兗州爲孔子脩飾墳隴更建碑銘褒揚聖德
又詔兗州刺史舉部內士人堪軍國及守宰政績者
具以名聞○六月魏主欲變易北俗謂群臣曰卿等
欲朕遠追商周爲欲不及漢晉邪咸陽王禧對曰群
臣願陛下度越前王耳魏主曰然則當變風易俗當
因循守故邪對曰願聖政日新魏主曰爲止於一身
爲欲傳之子孫邪對曰願傳之百世魏主曰然則必
當改作卿等不得違也對曰上令下從其誰敢違魏
主曰夫名不正言不順則禮樂不可興於是下詔斷
諸北語一從正音違者免官又詔求遺書祕閣所無

而有益於時用者加以優賞又詔改用長尺大斗其
法依漢志爲之○冬十二月調群臣曰國家從來有
一事可嘆臣下莫肯公言是非是也夫人君患不能
納諫人臣患不能盡忠自今朕舉一人如有不可卿
等直言其失若有才能而朕所不識卿等亦當舉之
如是得人者有賞不言者有罪卿等當知之○二十
三年夏四月殂在位二十三年享年三十二魏主幼
有至性年四歲時獻文患癰親爲之吮膿撫念諸弟
始終曾無纖介惇睦九族禮敬殊深聽覽政事從善
如流哀矜百姓恒思所以濟益天地五郊宗廟二分

之禮常必躬親。不以寒暑爲倦。尚書奏案多自尋省。百官大小無不留心。務於周洽。常從容謂史官曰。直書時事。無諱國惡。人君威福自己。史復不書。將何所懼。凡有修造。不得已而爲之。不爲不急之事。重損人力。有禁忌。讓厭之方。非典籍所載者。一皆除罷。雅好讀書。手不釋卷。五經之義。覽之便講。好爲文章。詩賦銘頌。在興而作。有大文筆。馬上口授。及其成也。不改一字。自太和十年以後。詔冊皆親爲之。自餘文章。百有餘篇。性儉素。常服澣濯之衣。鞍勒鐵木而已。其雅志皆此類也。

史臣論曰。有魏始基。代朔廓平。南夏闢土。經世咸以威武爲業。文教之事。所未遑也。孝文纂承。洪緒蚤著。敵聖之風。時以文明攝事。優游恭已。玄覽獨得。著自不言。及躬摠大政。一日萬機。十許年間。曾不暇給。殊途同歸。百慮一致。夫生靈所難行。人倫之高迹。雖尊居黃屋。盡蹈之矣。若乃欽明稽古。協御天人。帝王制作。朝野軌度。斟酌用舍。煥乎其有文章。海內黔黎。咸受耳目之賜。加以雄才大略。愛奇好士。視民如傷。役已利物。亦無得而稱之。其經緯天地。豈虛謚也。

周武帝

周主武帝姓宇文氏。諱邕。字禰羅突。文帝泰之第四子也。母曰叱奴太后。魏大統九年。生於同州。幼而孝敬。聰敏有器質。文帝異之。曰。成吾志者此兒也。年十二。封輔城郡公。孝閔踐阼。拜大將軍。出鎮同州。明帝卽位。遷柱國。授蒲州刺史。入爲大司空。行御正。進封魯國公。領宗師。甚見親愛。參議大事。性深沉。有遠識。非因問終無所言。武成二年夏四月。受明帝遺詔。卽皇帝位。○保定三年夏四月。將視學。以太傅燕國公子謹爲三老。仍賜以延年杖。遂幸太學。謹入門。周主

迎拜。謹答拜。有司設席於中楹。太師護設几。謹升席。南面。憑几而坐。大司馬豆盧寧正烏。周主立於斧扆之前。西面。有司進饌。周主跪設醬豆。袒割。謹食畢。周主跪授爵以醕。有司撤訖。周主北面立而訪道。謹起立於席後。對曰。木受繩則正。后從諫則聖。明王虛心納諫。以知得失。天下乃安。又曰。去食去兵。信不可去。願陛下守信勿失。又曰。有功必賞。有罪必罰。則爲善者日進。爲惡者日止。又曰。言行者立身之基。願陛下三思而言。九慮而行。勿使有過。天子之過。如日月之食。人莫不知。願陛下慎之。周主再拜受言。謹答拜禮。

成而出○天和元年秋七月詔諸胄子入學但束脩於師不勞釋奠釋奠者學成之祭自今卽爲恒式○八月詔諸有三年之喪或負土成墳或寢苦骨立一志一行可稱揚者本部官司隨事上言當加弔勉以勵薄俗○建德元年夏五月集百官於庭詔之曰亢陽不雨豈朕薄德刑賞乖中歟將公卿大臣或非其人歟宜盡直言無隱公卿各引咎自責其夜澍雨冬十二月御正武殿親錄囚徒至夜而罷○二年春三月皇太子於岐州獲白鹿二以獻詔答曰在德不在瑞○秋九月左宮正宇文孝伯言於周主曰皇太子

四海所屬而德聲未聞臣忝宮官實當其責請妙選正人爲其師友帝歛容曰卿世載鯁直竭誠所事觀卿此言有家風矣乃妙選宮官以補之○三年春正月詔自今男年十五女年十三以上爰及鰥寡所在以時嫁娶務從節儉○夏五月葬文宣后於固陵周主袒跣至陵所詔曰三年之喪達於天子但軍國務重須自聽朝衰麻之節苦廬之禮率遵前典以申罔極百僚宜依遺令既葬而除公卿固請依權制不許卒申三年之制五服之內亦令依禮○禁佛道二教經像悉毀罷沙門道士並令還俗并禁諸淫祀非禮

者盡除之。○六年春正月。詔曰。僞齊之末。姦佞擅權。濫罰淫刑。動挂羅網。故咸陽王斛律明月。及侍郎崔季舒等七人。或功高獲罪。或直言見誅。朕兵以義動。剪除凶暴。表閭封墓。事切下車。宜追贈謚。并加窆措。其見在子孫。各隨蔭叙錄。家口田宅。沒官者。並還之。又詔齊東山南園。及三臺并毀撤。瓦木諸物。凡入用者。盡賜百姓。山園之田。各還本主。○夏五月。祭方丘。詔以路寢會議崇信。舍仁雲和思齊諸殿。皆宇文護專政時所爲。事窮壯麗。有踰清廟。悉可毀撤。雕斲之物。並賜貧民。繕造之宜。務從卑朴。○秋七月。幸洛州。

詔山東諸州。舉有才望者。赴行在所。共論政事得失。○八月。議權衡度量。頒於天下。其不依新式者。悉追停之。○鄭州獻九尾狐。皮肉銷盡。骨體猶具。周主曰。瑞應之來。必昭有德。若使五品時序。四海和平。家識孝慈。人知禮讓。乃能致此。今無其時。恐非實錄。乃命焚之。○宣政元年。夏五月。殂。在位十八年。享年三十六。周主沉毅有智謀。初以宇文護專權。常自晦迹。人莫測其深淺。及誅護之後。始親萬機。克已勵精。聽覽不怠。號令懇惻。惟屬意於政。群下畏服。莫不肅然。凡布懷立行。皆欲踰越古人身衣布袍。寢布被。無金寶。

之飾。諸殿華綺者皆撤毀之。改爲土階數尺。不施櫨
拱。其雕文刻鏤錦繡纂組。一皆焚斷。後宮嬪御不過
十餘人。勞謙接下。自疆不息。以海內未康。銳情教習。
至於校兵閱武。步行山谷。履涉勤苦。皆人所不堪。平
齊之役。見軍士有跣行者。嘗親脫靴以賜之。每宴會
將士。必自執盃勸酒。或手付賜物。至於征伐之處。躬
在行陣。性又果決。能斷大事故。能得士卒死力。以弱
制疆。破齊之後。遂平突厥。定江南。一二年間。必使天
下一統。此其志也。

史臣論曰。自東西否隔。二國爭疆。戎馬生郊。干戈

日用。兵連禍結。力敵勢均。高祖繼業。未親萬機。慮
遠謀深。以蒙養正。及英威電發。朝政維新。內難既
除。外略方始。乃苦心焦思。克已勵精。勞役爲士卒
之先。居處同匹夫之儉。修富民之政。務疆兵之術。
乘讐人之有釁。順大道而推亡。五年之間。大勲斯
集。攄祖宗之宿憤。拯東夏之阡危。盛矣哉。其有成
功者也。

歷代君鑒卷之十五

漢高祖

漢高祖

漢高祖劉邦，沛縣人。秦末，起兵反秦，破秦入關，還軍霸上。沛公先破秦入咸陽，還軍霸上。以待將軍。勞苦功高，未有封爵之賞，而聽細人之說，誅有功之人。此所以將士不心，天下叛也。將軍聽細人之說，誅有功之人，此所以將士不心，天下叛也。將軍聽細人之說，誅有功之人，此所以將士不心，天下叛也。

歷代君鑒卷之十六

唐太宗

善可為法

唐太宗李世民，高祖第二子也。年四歲，有書生相之曰：龍鳳之姿，天日之表。年將二十，必能濟世安民。高祖因取其義以為名焉。隋大業末，佐高祖起義兵，取天下。帝之功居多。高祖即位，封帝為秦王。尋加天策上將，立為太子。詔禪位於帝。武德九年八月，帝即位。詔以宮女眾多，幽閔可愍，宜簡出之，各歸

太宗

太宗

太宗

太宗

親戚任其適人。○上於弘文殿聚四部書二十餘萬卷。置弘文館於殿側。精選天下文學之士。虞世南、褚亮、姚思廉、歐陽詢、蔡允恭、蕭德言等。以本官兼學士。令更日宿直。聽朝之際。引入內殿講論。前言往行。商榷政事。或至夜分乃罷。○上與群臣論止盜。或請重法以禁之。上哂之曰。民之所以爲盜者。由賦繁役重。官吏貪求。飢寒切身。故不暇顧廉恥耳。朕當去奢省費。輕徭薄賦。選用廉吏。使民衣食有餘。則自不爲盜。安用重法邪。又嘗謂侍臣曰。君依於國。國依於民。刻民以奉君。猶割肉以充腹。腹飽而身斃。君富而國亡。

故人君之患不自外來。常由身出。夫欲盛則費廣。費廣則賦重。賦重則民愁。民愁則國危。而君喪矣。朕常以此思之。故不敢縱欲也。○益州奏獠反。請發兵討之。上曰。獠依阻山林。時出鼠竊。乃其常俗。牧守苟能撫以恩信。自然帥服。安可輕動干戈。漁獵其民。比之禽獸。豈爲民父母之意邪。竟不許。○上謂裴寂曰。比多上書言事者。朕皆粘之屋壁。得出入省覽。每思治道。或深夜方寢。公輩亦當恪勤職業。副朕此意。上厲精求治。數引魏徵入卧內。訪以得失。徵知無不言。上皆欣然嘉納。○貞觀元年。制自今中書門下及三品。

以上入閣議事。皆命諫官隨之。有失輒諫。○上令右僕射封德彝舉賢。久無所舉。上詰之。對曰。非不盡心。但於今未有竒才耳。上曰。君子用人如器。各取所長。古之致治者。豈借才於異代乎。正患已不能知。安可誣一世之人。德彝慚而退。○上謂太子少師蕭瑀曰。朕少好弓矢。得良弓十數。自謂無以加。近以示弓工。乃曰。皆非良材。朕問其故。工曰。木心不直。則脉理皆邪。弓雖勁而發矢不直。朕始寤。彘者。辯之未精也。朕以弓矢定四方。識之猶未能盡。況天下之務。其能徧知乎。乃命京官五品以上。更宿中書內省。數延見問

民疾苦政事得失。○有上書請去佞臣者。上問佞臣爲誰。對曰。願陛下與群臣言。或陽怒以試之。彼執理不屈者。直臣也。畏威順旨者。佞臣也。上曰。君源也。臣流也。濁其源而求其流之清。不可得矣。君自爲詐。何以責臣下之直乎。朕方以至誠治天下。見前世帝王好以權譎。小數接其臣下者。常竊恥之。卿策雖善。朕不取也。○上神采英毅。群臣進見者。皆失舉措。上知之。每見人奏事。必假以辭色。冀聞規諫。嘗謂公卿曰。人欲自見其形。必資明鏡。君欲自知其過。必待忠臣。苟君懷諫。自賢其臣。阿諛順旨。君旣失國。臣豈能獨

全如虞世基等諂事煬帝以保富貴煬帝既弑世基等亦誅公輩宜用此爲戒事有得失無惜盡言○上謂公卿曰昔禹鑿山治水而民無謗讟者與人同利故也秦始皇營宮室而民怨叛者病人以利己故也夫美麗珍竒固人之所欲若縱之不已則危亡立至朕欲營一殿材用已具鑿秦而止王公已下宜體朕此意由是二十年間風俗素樸衣無錦繡公私富給○上謂黃門侍郎王珪曰國家本置中書門下以相檢察中書詔敕或有差失則門下當行駁正人心所見互有不同苟論難往來務求至當捨己從人亦復

何傷比來或護己之短遂成怨隙或苟避私怨知非不正順一人之顏情爲兆民之深患此乃亡國之政也煬帝之世內外庶官務相順從當是之時皆自謂有智禍不及身及天下大亂家國兩亡雖其間萬一有得免者亦爲時論所貶終古不磨卿曹各當徇公忘私勿雷同也○上謂侍臣曰吾聞西域賈胡得美珠剖身以藏之有諸侍臣曰有之上曰人皆知笑彼之愛珠而不愛其身也吏受賕抵法與帝王徇奢欲而亡國者何以異於彼胡之可笑邪魏徵曰昔魯哀公謂孔子曰人有好忘者徙宅而忘其妻孔子曰又

有甚者。桀紂乃忘其身。亦猶是也。上曰然。朕與公輩宜戮力相輔。庶免爲人所笑也。○二年。上謂王珪曰。開皇十四年大旱。隋文帝不許賑給。而令百姓就食山東。比至末年。儲積可供五十年。煬帝恃其富饒。侈心無厭。卒亡天下。但使倉庾之積足以備凶年。其餘何用哉。又謂侍臣曰。人言天子至尊。無所畏憚。朕則不然。上畏皇天之監臨。下憚群臣之瞻仰。兢兢業業。猶恐不合天意。未副人望。魏徵曰。此誠致治之要。願陛下慎終如始。則善矣。○大理少卿胡演進。每月囚帳。上命自今大辟。皆令中書門下四品已上及尚書

議之。庶無冤濫。既而引囚至岐州刺史鄭善果。上謂胡演曰。善果雖復有罪。官品不卑。豈可使與諸囚爲伍。自今三品已上犯罪。不須引過。聽於朝堂。俟進止。○關中旱饑。民多賣子。詔出內府金帛爲贖之。歸其父母。又以去歲霖雨。今茲旱蝗。赦天下。詔書略曰。若使年穀豐稔。天下乂安。移災朕身。以存萬國。是所願也。會所在有雨。民大悅。又以隋末亂離。饑饉暴骸滿野。詔所在官司收瘞。○突厥表請入朝。上謂侍臣曰。曷者突厥之彊。控弦百萬。憑陵中夏。用是驕恣。以失其民。今自請入朝。非困窮肯如是乎。朕聞之且喜且

懼何則。突厥衰則邊境安矣。故喜。然朕或失道。他日亦將如突厥。能無懼乎。卿曹宜不惜苦諫以輔朕之不逮也。○畿內有蝗。上入苑中見蝗。掇數枚祝之曰。民以穀爲命而汝食之。寧食吾之肺腸。舉手欲吞之。左右諫曰。惡物或成疾。上曰。朕爲民受災。何疾之避。遂吞之。是歲蝗不爲災。○上嘗曰。朕每臨朝。欲發一言。未嘗不三思。恐爲民害。是以不多言。給事中知起居事杜正倫曰。臣職在記言。陛下之言失。臣必書之。豈徒有害於今。亦恐貽譏於後。上悅。賜絹二百段。又曰。梁武帝君臣惟談苦空。侯景之亂。百官不能乘馬。

元帝爲周師所圍。猶講老子百官戎服以聽。此深足爲戒。朕所好者唯堯舜周孔之道。以爲如鳥有翼。如魚有水。失之則死。不可暫無耳。○上謂侍臣曰。古語有之。赦者小人之幸。君子之不幸。一歲再赦。善人喑啞。夫養稂莠者害嘉穀。赦有罪者賊良民。故朕卽位以來。不欲數赦。恐小人恃之輕犯憲章故也。○上曰。比見群臣屢上表賀祥瑞。夫家給人足而無瑞。不害爲堯舜。百姓愁怨而多瑞。不害爲桀紂。後魏之世。吏焚連理木。煮白雉而食之。豈足爲至治乎。詔自今大瑞聽表聞。諸瑞申所司而已。嘗有白鵲構巢於寢殿。

槐上合歡如腰鼓。左右稱賀。上曰。我常笑隋煬帝好祥瑞。瑞在得賢。此何足賀。命毀其巢。縱鵲於野外。○天少雨。中書舍人李百藥上言。往年雖出官人。竊聞太上皇宮及掖庭官人無用者尚多。豈惟虛費衣食。且陰氣鬱積。亦足致旱。上曰。婦人幽閉深宮。誠爲可愍。灑掃之餘。亦何所用。於是遣官於掖庭西門簡出之。前後所出三千餘人。○上曰。爲朕養民者。唯在都督刺史。朕常疏其名於屏風。坐卧觀之。得其在官善惡之跡。皆注於名下。以備黜陟。縣令尤爲親民。不可不擇。乃命內外五品以上。各舉堪爲縣令者。以名聞。

○三年。上謂房玄齡。杜如晦曰。公爲僕射。當廣求賢人。隨才授任。此宰相之職也。比聞聽受辭訟。日不暇給。安能助朕求賢乎。因敕尚書細務屬左右丞。唯大事乃關僕射。○上謂侍臣曰。中書門下。機要之司。詔敕有不便者。皆應論執。比來唯睹順從。不聞違異。若但行文書。則誰不可爲。何必擇才也。玄齡等皆頓首謝。○四年。上讀明堂鉞灸書。云人五藏之系。咸附於背。詔自今。毋得笞囚背。○上嘗與群臣語及教化。曰。今承大亂之後。恐斯民未易化也。魏徵對曰。不然。久安之民。驕佚。驕佚則難教。經亂之民。愁苦。愁苦則易。

化。譬猶飢渴之易飲食也。上深然之。封德彝非之曰。三代以還。人漸澆訛。故秦任法律。漢雜霸道。蓋欲化而不能。豈能之而不欲邪。魏徵書生。未識時務。若信其虛論。必敗國家。徵曰。五帝三王。不易民而化。湯武皆承大亂之後。身致太平。若謂古人淳樸。漸致澆訛。則至于今日。當悉化為鬼魅矣。人主安得而治之。上卒從徵言。元年關中饑。米斗直絹一匹。二年天下蝗。三年大水。上勤而撫之。民雖東西就食。未嘗嗟怨。是歲天下大稔。流散者咸歸鄉里。米斗不過三四錢。終歲斷死刑纔二十九人。東至于海南。及五嶺。皆外戶

不閉。行旅不齎糧。取給道路焉。上謂長孫無忌曰。貞觀初。上書者皆云。人主當獨運威權。征討四夷。唯魏徵勸朕偃武脩文。中國既安。四夷自服。朕用其言。今頡利成擒。其酋長並帶刀宿衛。部落皆襲衣冠。徵之力也。但恨不使封德彝見之耳。時德彝已死。○五年。有司上言。皇太子當冠。用二月吉。請追兵備儀仗。上曰。東作方興。宜改用十月。少傅蕭瑀奏。據陰陽書。不若二月。上曰。吉凶在人。若動依陰陽。不顧禮義。吉可得乎。循正而行。自與吉會。農時最急。不可失也。○隋末。中國人多沒於突厥。及突厥降。上遣使以金帛贖

之。凡得男女八萬口。又遣使詣高麗收隋氏戰亡骸骨。葬而祭之。○林邑獻五色鸚鵡。新羅獻美女二人。上曰。林邑鸚鵡猶能自言苦寒。思歸其國。況二女遠別親戚乎。并鸚鵡各付使者而歸之。○上謂侍臣曰。朕以死刑至重。故令三覆奏。蓋欲思之詳熟故也。而有司須臾之間。三覆已訖。今制決死囚者。二日中五覆奏。下諸州者。三覆奏。行刑之日。尚食勿進酒肉。內教坊及太常不舉樂。皆令門下覆視。有據法當死而情可矜者。錄狀以聞。由是全活甚衆。○上謂執政曰。朕嘗恐因喜怒妄行賞罰。故欲公等極諫。公等亦宜

受人諫。不可以已之所欲。惡人違之。苟自不能受諫。安能諫人。○康國來內附。上曰。前代帝王好招來絕域。以求服遠之名。無益於用。而糜敝百姓。今康國內附。儻有急難。於義不得不救。師行萬里。豈不疲勞。百姓以取虛名。朕不為也。遂不受。謂侍臣曰。治國如治病。病雖愈。尤宜將護。儻遽自放縱。病復作。則不可救矣。今中國幸安。四夷俱服。誠自古所希。然朕日慎一日。唯懼不終。故欲數聞卿輩諫爭也。○七年。上謂侍臣曰。朕比來決事。或不能皆如律令。公輩以為事小。不復執奏。夫事無不由小。以致大。此乃危亡之端也。

昔關龍逢忠諫而死。朕每痛之。煬帝驕暴而亡。公輩所親見也。公輩常宜爲朕思。煬帝之亡。朕常爲公輩念。關龍逢之死。何患君臣不相保乎。○上謂魏徵曰。爲官擇人。不可造次。用一君子。則君子皆至。用一小人。則小人競進矣。○工部尚書段綸表徵巧工楊思齊。上令試之。綸使先造傀儡。上曰。得巧工。庶供國事。卿令先造戲具。豈百工相戒無作淫巧之意邪。乃削綸階。○八年。上欲分遣大臣爲諸道黜陟大使。未得其人。李靖薦魏徵。上曰。徵箴規朕失。不可一日離左右。乃命靖與太常卿蕭瑀等凡十三人分行天下。察

長吏賢不肖。問民間疾苦。禮高年。賑窮乏。褒善良。起滯淹。俾使者所至如朕親睹。○上聘隋通事舍人鄭仁基女爲充華。詔已行。冊使將發。魏徵聞其嘗許嫁士人陸爽。遽上表諫。上聞之大驚。手詔深自克責。命停冊使。○治書侍御史權萬紀。上言宜饒二州銀大發。采之歲可得數百萬緡。上曰。朕貴爲天子。所乏者非財也。但恨無嘉言可以利民耳。與其多得數百萬緡。何如得一賢材。卿未嘗進一賢退一不肖。而專言稅銀之利。昔堯舜抵璧於山。投珠於谷。漢之桓靈。乃聚錢爲私藏。卿欲以桓靈俟我邪。是日黜萬紀。使還

家○著作佐郎鄧世隆表請集上文章。上曰。朕之辭
令有益於民者。史皆書之。足爲不朽。若其無益。集之
何用。梁武帝父子。陳後主。隋煬帝。皆有文集。行于世。
何救於亡。爲人主。患無德政。文章何爲。遂不許。○上
問侍臣。帝王創業與守成孰難。房玄齡曰。草昧之初。
與群雄並起。角力而後。臣之創業難矣。魏徵曰。自古
帝王。莫不得之於艱難。失之於安佚。守成難矣。上曰。
玄齡與吾共取天下。出百死得一生。故知創業之難。
徵與吾共安天下。常恐驕奢生於富貴。禍亂生於所
忽。故知守成之難。然創業之難。旣已往矣。守成之難。

方當與諸公慎之。玄齡等拜曰。陛下及此言。四海之
福也。○十四年。先是武德舊制。釋奠於太學。以周公
爲先聖。孔子配饗。上從玄齡等議。停祭周公。以孔子
爲先聖。顏回配饗。至是。上幸國子監。觀釋奠。命祭酒
孔穎達講孝經。賜祭酒以下。至諸生高第。帛有差。是
時。上大徵天下名儒爲學官。數幸國子監。使之講論。
學生能明一經已上。皆得補官。增築學舍千二百間。
增學生滿三千二百六十員。自屯營飛騎。亦給博士。
使授以經。有能通經者。聽得貢舉。於是四方學者雲
集京師。乃至高麗。百濟。新羅。高昌。吐蕃。諸酋長。亦遣

子弟請入國學。升講筵者至八千餘人。上以師說多門。章句繁雜。命孔穎達與諸儒撰定五經疏。謂之正義。令學者習之。○十五年。上指殿屋謂侍臣曰。治天下如建此屋。營構既成。勿數改移。苟易一樣。正一瓦。踐履動搖。必有所損。若慕竒功。變法度。不恒其德。勞擾實多。又曰。朕有二喜一懼。比年豐稔。長安米價直三四錢。一喜也。北虜久服。邊鄙無虞。二喜也。治安則驕侈易生。驕侈則危亡立至。此一懼也。○并州大都督長史李世勣。在州十六年。令行禁止。民夷懷服。上曰。隋煬帝勞百姓築長城。以備突厥。卒無所益。朕唯

置李世勣於晉陽。而邊塵不驚。其爲長城。豈不壯哉。以世勣爲兵部尚書。○十六年。上嘗止樹下。愛之。宇文士及從而譽之不已。上正色曰。魏徵嘗勸我遠佞人。我不知爲誰。意疑是汝。今果不謬。士及叩頭謝。○上曰。朕爲兆民之主。皆欲使之富貴。若教以禮義。使之少敬長。婦敬夫。則皆貴矣。輕徭薄斂。使之各治生業。則皆富矣。若家給人足。朕雖不聽管絃。樂在其中矣。○十七年。魏徵疾甚。家初無正寢。上命輟小殿材爲營構。五日畢。并賜素褥布被。以從其尚。及薨。詔陪葬昭陵。上登苑西樓。望哭盡哀。後臨朝。歎曰。以銅爲

鑑可正衣冠。以古爲鑑。可知興替。以人爲鑑。可明得失。朕嘗保此三鑑。內防已過。今魏徵逝。一鑑亡矣。○上曰。人主唯有一心。而攻之者甚衆。或以勇力。或以辯口。或以諂諛。或以姦詐。或以嗜欲。輻湊攻之。各求自售。以取寵祿。人主少懈。而受其一。則危亡隨之。此其所以難也。○上命圖畫功臣。趙公長孫無忌。趙郡元王孝恭。萊成公杜如晦。鄭文貞公魏徵。梁公房玄齡。申公高士廉。鄂公尉遲敬德。衛公李靖。宋公蕭瑀。褒忠壯公段志玄。夔公劉弘基。蔣忠公屈突通。鄭節公殷開山。譙襄公柴紹。邳襄公長孫順德。鄭公張亮。

陳公侯君集。剡襄公張公謹。盧公程知節。永興文懿公虞世南。渝襄公劉政會。苜公唐儉。英公李世勣。胡壯公秦叔寶等。於凌烟閣。○皇太子立。李世勣爲詹事。勣旣忠力。上謂可託大事。嘗暴疾。鑿曰鬚灰可治。上乃自剪鬚以和藥。及愈入謝。上曰。吾爲社稷計。何謝爲。上謂侍臣曰。朕自立太子。遇物則誨之。見其飯則曰。汝知稼穡之艱難。則常有斯飯矣。見其乘馬。則曰。汝知其勞逸。不竭其力。則常得乘矣。見其乘舟。則曰。水所以載舟。亦所以覆舟。民猶水也。君猶舟也。見其息于木下。則曰。木從繩則正。后從諫則聖。○十九

年詔謚殷太師比干曰忠烈所司封其墓春秋祠以少牢給隨近五戶供灑掃○二十年李世勣等大破薛延陀北荒悉平上幸靈州爲詩序其事曰雪恥酬百王除兇報千古○十二月癸未上謂長孫無忌等曰今日吾生日世俗皆爲樂在朕翻成傷感今君臨天下富有四海而承歡膝下永不可得此子路所以有負米之恨也詩云哀哀父母生我劬勞柰何以劬勞之日更爲宴樂乎因泣數行下左右皆悲○二十一年詔曰左丘明卜子夏公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭

玄服虔何休王肅王弼杜預范甯等二十有一人竝用其書垂於國胄旣行其道理合褒崇自今有事於太學可竝配饗尼父廟堂○二十二年上作帝範十二篇以賜太子曰君體建親求賢審官納諫去讒戒盈崇儉賞罰務農閱武崇文且曰脩身治國備在其中夫成遲敗速者國也失易得難者位也可不惜哉可不慎哉二十三年五月上崩於含風殿在位二十三年壽五十二

宋臣歐陽脩贊曰盛哉太宗之烈也其除隋之亂比跡湯武致治之美庶幾成康自古功德兼隆由

漢以來未之有也。至其牽於多愛，復立浮圖，好大喜功，勤兵於遠。此中材庸主之所常爲。然春秋之法，常責備於賢者。是以後世欲成人之美者，莫不歎息於斯焉。宋儒范祖禹曰：太宗以武撥亂，以仁勝殘，其材略優於漢高，而規模不及也。恭儉不若孝文，而功烈過之矣。迹其性本強悍，勇不顧親，而能畏義，好賢，屈已從諫，刻厲矯揉，力於爲善，此所以致貞觀之治也。夫賢君不世出，自周武成，康歷八百餘年，而後有漢。漢八百餘年，而後有太宗。其所成就如此，豈不難得哉！人君擇其善者而從之，

足以得師矣。

歷代君鑒卷之十六

及以辨明矣

歷代君鑒卷之十七

善可為法

唐

憲宗

憲宗諱純。順宗長子也。貞元二十一年立為太子。詔傳位于帝。永貞元年八月。帝即位。○荆南獻毛龜二。上曰。朕所寶惟賢。嘉禾靈芝皆虛美耳。所以春秋不書祥瑞。自今凡有嘉瑞。但準令申有司。勿復以聞。及珍禽竒獸。皆毋得獻。○元和二年。蜀既平。藩鎮惕息。多求入朝。鎮海節度使李錡亦不自安。求入朝。上許。

之遣中使慰勞。錡實無行意。上表稱疾。上以問宰相。武元衡曰。陛下初卽政。錡求朝得朝。求止得止。可否在錡。將何以令四海。上以爲然。下詔徵之。錡詐窮。遂謀反。制削其官爵及屬籍。興兵討之。牙將張子良執錡。械送京師。斬之。群臣賀於紫宸殿。上愀然曰。朕之不德。致宇內數有干紀者。朕之媿也。何賀之爲。有司籍錡家財輸京師。翰林學士張垪。李絳上言。願以賜浙西百姓。代今年租賦。上嘉歎久之。卽從其言。○上謂宰相曰。太宗以神聖之資。群臣進諫者。猶反覆數四。況朕寡昧。自今事有違宜。卿當十論。無但一二而已。

○以戶部侍郎裴垪爲中書侍郎同平章事。初。德宗不任宰相。天下細務皆自決之。由是裴延齡輩得用事。上在藩邸。心固非之。及卽位。選擢宰相。推心委之。嘗謂垪等曰。以太宗玄宗之明。猶藉輔佐以成其理。況如朕不及先聖萬倍者乎。○四年。南方旱饑。命左司郎中鄭敬等爲江淮二浙荆湖襄鄂等道宣慰使。賑卹之。將行。上戒之曰。朕宮中用帛一匹。皆籍其數。惟調救百姓。則不計費。卿輩宜識此意。○上以久旱。欲降德音。李絳白居易上言。以爲欲令實惠及人。無如減其租稅。出宮人。絕諸道進奉。禁掠賣良人。上

悉從之。制下而雨。○左軍中尉吐突承瓘領功德使盛脩安國寺。奏立聖德碑。先構樓。請敕學士撰文。欲以萬緡酬之。上命李絳爲之。絳言堯舜禹湯未嘗立碑。自言聖德。惟秦始皇刻石。高自稱述。未審陛下欲何所法。且敘脩寺之美。豈所以光益聖德。上覽奏。承瓘適在旁。命曳倒碑樓。承瓘言樓大不可曳。請徐毀。撤冀得延引。乘間再論。上厲聲曰。多用牛曳之。承瓘乃不敢言。凡用百牛曳之。乃倒。○五年。上每有軍國大事。必與諸學士謀之。嘗踰月不見學士。承旨李絳等上言。臣等飽食不言。其自爲計則得矣。如陛下何。

陛下詢訪理道。開納直言。實天下之幸。非臣等之幸也。上遂召對。白居易嘗因論事言陛下錯。上色莊而罷。密召絳。謂曰。居易小臣。不遜。須令出院。絳曰。陛下容納直言。故群臣敢竭誠無隱。居易言雖少。思志在納忠。陛下今日罪之。臣恐天下各思箝口。非所以廣聰明。昭聖德也。上悅。待居易如初。上嘗欲近獵。死中至蓬萊池西。謂左右曰。李絳必諫。不如且止。絳嘗面陳吐突承瓘專橫。語極懇切。上作色曰。卿言太過。絳泣曰。陛下置臣於腹心耳目之地。若臣畏避左右。愛身不言。是臣負陛下。言之而陛下惡聞。乃陛下負臣。

也。上怒解曰。卿所言皆人所不能言。使朕聞所不聞。真忠臣也。他日盡言皆應如是。遂以絳爲中書舍人。學士如故。絳嘗從容諫。上聚財。上曰。今兩河數十州。皆國家政令所不及。河湟數千里。淪於左衽。朕日夜思雪祖宗之恥。而財力不贍。故不得不蓄聚耳。不然。朕官中用度極儉薄。多藏何用邪。○以戶部侍郎李絳爲中書侍郎同平章事。李吉甫爲相。多脩舊怨。上頗知之。故擢絳爲相。吉甫善逢迎。上意而絳鯁直。數爭論於上前。上多直絳而從其言。上嘗御延英殿。吉甫言天下已太平。陛下宜爲樂。絳曰。漢文帝時。兵木

無刃。家給人足。賈誼猶以爲厝火積薪之下。不可謂安。今法令所不能制者。河南北五十餘州。犬戎腥羶。近接涇隴。烽火屢驚。加之水旱時作。倉庫空虛。此正陛下宵衣旰食之時。豈得謂之太平遽爲樂哉。上欣然曰。卿言正合朕意。退謂左右曰。吉甫專爲媚悅。如李絳真宰相也。上嘗問貞元中政事不理。何乃至此。吉甫對曰。德宗自任聖智。不信宰相而信他人。使姦臣得乘間弄威福。故也。上曰。然此亦未必皆德宗之過。朕幼在德宗左右。見事有得失。當時宰相亦未有再三執奏者。今日豈得專歸咎於德宗邪。卿輩宜用

此爲戒事有非是當力陳不已。勿畏朕譴怒而遽止也。吉甫嘗言人臣不當疆諫使君悅臣安不亦美乎。絳曰人臣當犯顏苦口指陳得失若陷君於惡豈得爲忠。上曰絳言是也。李絳或久不諫上輒詰之曰豈朕不能容受邪將無事可諫也。吉甫又嘗言於上曰賞罰人主之二柄不可偏廢。今惠澤已深而威刑未振中外懈惰願加嚴以振之。上顧絳曰何如。對曰王者之政尚德不尚刑豈可捨成康文景而效秦始皇父子乎。上曰然後旬餘于頔入對亦勸上峻刑。上謂宰相曰于頔大是姦臣勸朕峻刑卿知其意乎。皆對

曰不知也。上曰此欲使朕失人心耳。吉甫失色退而不言。笑竟日。○上謂宰相曰卿輩屢言淮浙去歲水旱近有御史自彼還言不至爲災事竟如何。絳對曰臣按淮浙奏狀皆云水旱人流求設法招撫其意似恐朝廷罪之者豈肯無災而妄言有災邪。此蓋御史欲爲姦諛以悅上意耳。上曰卿言是也。國以人爲本聞有災當亟救之豈可復疑之邪。因命速蠲其租賦。上嘗與宰相論治道於延英殿日旰暑甚汗透御服宰相恐上體倦求退。上畱之曰朕入禁中所與處者獨官人宦官耳。故樂與卿等且共談爲理之要。殊不

知倦也。○魏博節度使田季安死，子懷諫幼弱，軍中請襲節度，吉甫議討之。俄而士卒立其兵馬使田興為留後，以魏博聽命，絳言王化不及魏博久矣。一旦絜六州來歸，不大犒賞，人心不激，請斥禁錢百五十萬緡，賜其軍。上曰：朕所以惡衣菲食，蓄聚貨財，正為欲平定四方，不然徒貯之府庫，何為？於是遣制誥裴度至魏博宣慰，以錢賞軍士，六州百姓給復一年。軍士受賜，歡聲如雷。○八年大水，上以為陰盈之象，出宮人二百車。○九年，彰義軍節度使吳少陽卒，其子元濟自稱知軍事，縱兵侵掠，及東畿，制削其官爵。

趣諸道兵進討。十年，王師討蔡，久未有功。上遣御史中丞裴度詣行營宣慰，察用兵形勢。度還，奏攻取策，與上意合。上問諸將才否，度對曰：李光顏義而勇，當有成功。知制誥韓愈亦奏言：淮西以三州殘弊困劇之餘，而當天下全力，其敗可立而待也。然所未可知者在陛下斷與不斷耳。不三日，光顏奏破淮西兵於時曲。上以度為知人。上悉以兵事委武元衡，或說平盧節度使李師道曰：天子所以銳意誅蔡者，元衡贊之也。請密往刺之。元衡死，則他相不敢主其事，爭勸罷兵矣。師道乃謀緩蔡兵，伏盜京師，刺害元衡，又擊

裴度傷首不死。賊因亡去。議者欲罷度。安二鎮反側。上怒曰。度若罷。是賊計得行。朝廷無復綱紀。吾倚度足破三賊矣。上益信任。拜中書侍郎同平章事。時方連諸道兵。環擊不解。內有大恐。人累息。及度當國外。內始安。由是討賊益急。後討蔡數不利。群臣爭請罷兵。裴度奏病在腹心。不時去。且為大患。不然。兩河亦將視此為逆順。會唐鄧節度使高霞寓戰敗。他相揣上厭兵。欲赦賊。鈞上指。上曰。一勝一負。兵家常勢。若師常利。則古何憚用兵邪。雖累聖亦不應留賊。付朕。今但論帥臣勇怯。兵強弱。處置何如耳。詎可一敗便

沮成計乎。於是獨用度言。他言罷兵者稍息。○十二年。宰相李逢吉。王涯。以淮西不克。餉億煩匱。競言宜休師。唯裴度請身督戰。上獨曰。度留。曰。果為朕行乎。度俯伏曰。臣誓不與賊俱存。即拜淮西宣慰招討使。奏馬總為副使。韓愈為行軍司馬。度將行。入曰。主憂臣辱。義在必死。賊未授首。臣無還期。上壯之。為流涕。○初。國子祭酒孔戣為華州刺史。明州歲貢蚶蛤淡菜。水陸遞夫勞費。戣奏疏罷之。至是。嶺南節度使崔詠薨。宰相奏擬代詠者數人。上皆不用。曰。頃有諫進蚶蛤淡菜者。為誰。可求其人與之。遂以戣為嶺南節

度使○淮西行營奏獲吳元濟光祿少卿楊元卿言於上曰淮西大有珍寶臣能知之往取必得上曰朕討淮西爲人除害珍寶非所求也唐隋鄧節度使李愬擒吳元濟械送京師詔韓弘裴度條列平蔡將士功狀及蔡之將士降者皆差第以聞淮西州縣百姓給復二年近賊四州免來年夏稅官軍戰亡者皆爲收葬給其家衣糧五年其因戰傷殘廢者勿停衣糧上御興安門受俘遂以吳元濟獻廟社斬于獨柳之下以李愬爲山南東道節度使賜爵涼國公加韓弘兼侍中李光顏等遷官有差賜裴度爵晉國公復入

知政事以馬總爲淮西節度使○裴度之在淮西也布衣栢耆以策干韓愈曰吳元濟旣就擒王承宗破膽矣願得奉丞相書往說之可不煩兵而服愈白度爲書遣之承宗懼求哀於田弘正請以二子爲質及獻德棣二州輸租稅請官吏弘正爲之奏請上初不許弘正上表相繼上重違弘正意乃許之魏博乃遣使送承宗子知感知信及德棣二州圖印至京師○幽州大將譚忠說劉總曰自元和以來劉闢李錡田季安盧從史吳元濟阻兵馮險自以爲深根固蒂天下莫能危也然顧盼之間身死家覆皆不自知此非


人力所能及。殆天誅也。況今天子神聖威武。苦身焦思。縮衣節食。以養戰士。此志豈須臾忘天下哉。今國兵駸駸北來。趙人已獻城十二。忠深爲公憂之。總泣且拜曰。聞先生言。吾心定矣。遂專意歸朝廷。○淮西平。平盧節度使李師道憂懼。遣使奉表請使長子入侍。并獻沂密海三州。上許之。遣左常侍李遜詣鄆州宣慰。遜至鄆。察師道非實誠。歸言於上曰。師道頑愚。反覆。恐必須用兵。旣而師道表言軍情不聽。納質割地。上怒。決意討之。乃下制罪狀。令宣武魏博義成武寧橫海兵共討之。魏博義成軍送所獲鄆州牙將夏

侯澄等四十七人。上皆釋弗誅。各付所獲行營驅使。曰。若有父母欲歸者。優給遣之。朕所誅者師道而已。於是賊中聞之。降者相繼。平盧都將劉悟乃夜襲師道。捕斬之。函首以聞。淄青等十二州皆平。上命戶部侍郎楊於陵爲淄青宣撫使。自廣德以來垂六十年。藩鎮跋扈。河南北三十餘州。自除官吏。不供貢賦。至是盡遵朝廷約束矣。裴度纂述蔡鄆用兵以來。上之憂勤機略。因侍宴獻之。請內印出付史官。上曰。如此似出朕志。非所欲也。弗許。○自淮西旣平。上浸驕侈。皇甫鏞程昇以聚斂有寵。得爲相。晚節好神仙。柳泌

爲上治丹劑求長生。上御劑多躁怒。左右往往獲罪。有死者。人人自危。十五年正月。上暴崩於中和殿。時人皆言內常侍陳弘志弑逆。其黨類諱之。不敢討賊。但云藥發。外人莫能明也。在位十五年。壽四十三。宋臣歐陽脩贊曰。憲宗剛明果斷。自初卽位。慨然發憤。志平僭叛。能用忠謀。不惑群議。卒收成功。自吳元濟誅。強藩悍將皆欲悔過而效順。當此之時。唐之威令幾於復振。及其晚節。信任非人。不終其業。而身罹不測之禍。嗚呼。小人之能敗國也。不必愚君闇主。雖聰明聖智。苟有惑焉。未有不爲患者。

也。宋儒司馬光曰。憲宗聰明果決。得於天性。選任忠良。延納善謀。師老財屈。異論輻湊。而不爲之疑。盜發都邑。屠害元宰。而不爲之懼。卒能取靈夏。清劔南。誅浙西。俘澤潞。平淮右。復齊魯。於是天下深根固蒂之盜。皆狼顧鼠拱。納質效地。稽顙入朝。百年之憂。一旦廓然矣。而怠於防微。變生肘腋。悲夫。

歷代君鑒卷之十七



Faint vertical text columns, likely bleed-through from the reverse side of the page. The characters are difficult to decipher due to fading.

天保辛卯

